

- 4110 de ander de helfte van synen oren.
mochte ik sulven vor den konnink komen,
dat scholde ên beden weinich vromen.
dat mêste my wert schaden daran
is, ik bin in des pawes ban.
- 4115 de provest heft der sake macht,
de by dème konninge is in groter acht.
darumme ik in dème banne bin
is dat ik Ysegrime gaf den sin,
do he monnik was geworden,
- 4120 dat he wechlêp út dème orden,
do he tor Elemâr was begeven;
he swôr, he konde also nicht leven
in also hardem strengen wesen,
so lange to vasten, so vele to lesen.
- 4125 ik halp eme wech, dat ruwet my sere;
dârvor deit he my wedder unere
jegen den konnink to voren an,
unde deit my quât alwôr he kan.
schal ik to Rome, dat wil sêr hinderen
- 4130 mynem wyve unde mynen kinderen;
wente Ysegrim de let des nicht,
he deit enen quât, wôr he se kricht,
mit anderen, de my syn sêr quât,
unde sôken up my sêr bosen rât.
- 4135 were ik út dème banne gelöst,
so hadde ik sus wol bêtteren trôst
unde mochte uprichtich mit gemake
sprêken vor myne egene sake. —
Marten sprak: Reinke, leve ôm,
- 4140 ik wil recht nu up na Rôm;
ik wil ju helpen mit schonen stucken
unde wil ju nicht laten vordrucken.
bin ik doch des bischoppes klerk,
ja, gans wol vorsta ik my up dat werk:
- 4145 ik wil den provest to Rôm citeren,
unde wil jegen ên also pleiteren,
sêt, ôm, unde dôn ju excucien
unde bringen ju ene absolucien
synes undankes, were it eme ôk lêt;
- 4150 wente ik to Rome den lôp wol wêt,
wat ik schal laten este dôn.
dâr is ôk myn ôm Symon,
de mechtich is unde sêr vorheven,
he helpet dème gêrne, de wat mach geven.
- 4155 her Schalkevunt is dâr ôk ên here,
ôk doctor Gryptô unde der noch mere,
her Wendehoike mit her Losevunde:
dit syn alle dâr unse vrunde.
ik hebbe gelt vorhen gesant,